

Pam mae angen mwy o gyfleusterau i drin ein gwastraff?

Taflen Ffeithiau 1

Pam na allwn ni barhau i anfon ein sbwriel i safleoedd tirlenwi?



Mae yna nifer o resymau pam na allwn ni barhau i anfon ein sbwriel i safleoedd tirlenwi:

Mae nifer y safleoedd tirlenwi sydd ar gael yn lleihau

Mae'r safleoedd tirlenwi sy'n cael eu defnyddio ar hyn o bryd bron yn llawn, ac nid oes llawer o ardaloedd ar gael ar gyfer creu rhai newydd.

Cyfyngiadau ar anfon sbwriel i safleoedd tirlenwi

Gall gwaredu gwastraff gwyrdd a gwastraff o'r gegin (gwastraff bioddiraddiadwy) mewn safle tirlenwi achosi methan, sy'n un o'r nwyon tŷ gwydr cryfaf. Oherwydd hynny, mae'r Undeb Ewropeaidd (UE) wedi pennu targedau i'n helpu i osgoi anfon elfen fiogdiraddiadwy (gwastraff gwyrdd a gwastraff o'r gegin) ein sbwriel cartref i safleoedd tirlenwi. Rhaid i ni gyrraedd y targedau hyn neu wynebu dirwyon mawr am bob tunnell o wastraff a anfonwn i safleoedd tirlenwi.

Mynydd Sbwriel sy'n Tyfu

Hanes o ddympio'r rhan fwyaf o'n sbwriel mewn safleoedd tirlenwi sydd gennym yng Nghymru. Un o'r rhesymau am hyn yw bod tirlenwi yn rhad iawn. Rhaid talu treth tirlenwi i waredu sbwriel ar y safle, ac yn y DU mae treth tirlenwi yn costio tua £14 ar gyfer pob tunnell o sbwriel, o gymharu â thua £40 y tunnell yn Ewrop. Bydd treth tirlenwi'n codi'n sylweddol dros y blynyddoedd nesaf er mwyn ein helpu i osgoi defnyddio safleoedd tirlenwi, ond rydym yn cynhyrchu mwy a mwy o sbwriel bob blwyddyn. O ganlyniad, bydd angen i ni ganfod ffordd o drin yr holl wastraff.

Peryglon Llygru

Rheoleiddir safleoedd tirlenwi yn llym gan Asiantaeth yr Amgylchedd, ond yn y gorffennol, pan nad oedd y rheolau mor gadarn, gallai safleoedd tirlenwi achosi problemau i gymdogion gan ddenu pryfed a chreu aroglau, sbwriel a sŵn yn yr ardal gyfagos. Cafwyd achosion o lygru hefyd, wrth i gemegau (trwytholch) o'r sbwriel ollwng i'r tir neu'r dŵr cyfagos.

Rydym yn colli adnoddau gwerthfawr

Wrth gladdu ein sbwriel rydym yn colli adnoddau gwerthfawr a gallem ailgylchu llawer o ddeunyddiau sy'n mynd i safleoedd tirlenwi ar hyn o bryd. Os ydynt yn mynd i safleoedd tirlenwi rydym yn eu colli am byth. Er enghraifft, mae angen 4 tunnell o ddeunydd crai (bocsit) i wneud 1 tunnell o alwminiwm. Mae'r gwaith o gloddio am focsit mewn gwledydd fel Ghana a Jamaica yn dinistrio coedwigoedd glaw. Pam ddylen ni anfon caniau alwminiwm i safleoedd tirlenwi yn lle eu hailgylchu a helpu i ddiogelu'r amgylchedd?

Os na allwn ni anfon ein sbwriel i safleoedd tirlenwi beth allwn ni ei wneud?

Mae sawl ffordd wahanol o ymdrin â'n gwastraff. Mae angen i ni droi ein **sbwriel yn adnodd!** Yn gyntaf rhaid i ni geisio lleihau faint o sbwriel a gynhyrchwn trwy feddwl yn ofalus am y nwyddau a brynwn - oes angen bag plastig arall arnoch, neu allwch chi fynd â'ch bag brethyn i'r archfarchnad? Yn ail, mae angen i ni aildefnyddio'r deunyddiau rydym yn barod i'w taflu - all rhywun arall ddefnyddio'ch hen feic? Ac yn drydydd mae angen i ni geisio ailgylchu a chompostio cymaint o ddeunyddiau â phosibl.

Strategaeth Amgylcheddol ar gyfer Cymru 2006:

"Ein dyhead yw na fydd unrhyw dirlenwi ychwanegol ar gyfer gwastraff trefol yng Nghymru erbyn 2026."

Beth sy'n digwydd i'r sbwriel sydd ar ôl?

Mae yna nifer o opsiynau ar gyfer y gwastraff sydd ar ôl:

1. Triniaethau Biolegol
 - Compostio Caeedig
 - Cafn Troi Compost
 - Treulio Anerobig
2. Triniaethau Biolegol Mecanyddol (MBT)
 - MBT
 - BMT
3. Triniaethau Thermol
 - Troi Ynni yn Wastraff (EfW) – gan gynnwys Gwres a Phŵer Cyfunedig
 - Triniaeth Thermol Uwch (ATT)
 - Pyrolysis
 - Nwyeiddio

Mae'r dulliau hyn i gyd yn fodd o geisio cael gwerth o'ch sbwriel, boed trwy ei droi'n gompost neu ei wresogi i gynhyrchu trydan a gwres. Gallwch chi ddysgu mwy am driniaethau gwastraff trwy ddarllen y taflenni ffeithiau eraill yn y gyfres hon.

Pam mae angen mwy o gyfleusterau arnom?

Rydym wedi dibynnu ar anfon ein gwastraff i safleoedd tirlenwi am flynyddoedd lawer. Mae'n rhaid i ni ddod o hyd i opsiynau eraill ar gyfer ein gwastraff, a hynny ar frys!

Er mwyn cyrraedd ein targedau ar gyfer stopio anfon gwastraff i safleoedd tirlenwi, rhaid i ni ddechrau defnyddio cyfleusterau eraill yn syth bin. Amcangyfrifir y bydd angen i 600 o gyfleusterau trin gwastraff fod ar waith erbyn 2010 i sicrhau bod Cymru'n cyflawni ei rhwymedigaethau o dan Gyfarwyddeb Tirlenwi yr UE (1999/31/CE).

Ar hyd o bryd, tua 250 o gyfleusterau yn unig sydd ar waith. Wrth gofio y bydd angen dylunio, cynllunio ac adeiladu cyfleusterau newydd, mae amser yn gwibio heibio.



Beth alla i ei wneud?

Rydych chi'n cynhyrchu gwastraff y mae'n rhaid i'ch awdurdod lleol ei gasglu a'i drin. Mae nifer o ffyrdd y gallwch chi wneud gwahaniaeth er mwyn cynorthwyo'ch awdurdod lleol a'r amgylchedd. Meddyliwch yn gyntaf am y sbwriel rydych chi'n ei gynhyrchu ar hyn o bryd, ac ystyriwch sut y gallech chi ei **leihau**.

Allech chi **ailgylchu** neu **gompostio** mwy o'ch gwastraff? Yn ail, cymerwch ddiddordeb yn yr hyn mae'ch awdurdod lleol yn ei ystyried. Byddant yn gwneud penderfyniadau anodd yn fuan am y ffordd y bydd eich gwastraff yn cael ei reoli yn ystod yr 20 i 30 mlynedd nesaf.

Cymerwch ran yn y broses ymgynghori, ceisiwch ddarganfod mwy am yr hyn maen nhw'n ei ystyried a rhowch wybod i'ch cymdogion! Mae pob un ohonom yn cynhyrchu sbwriel ac mae angen i ni ddechrau cymryd cyfrifoldeb am y ffordd rydyn ni'n cael gwared arno. Cysylltwch â'ch awdurdod lleol i ddarganfod mwy am yr hyn mae'n ei

ystyried neu darllenwch ei strategaeth gwastraff arfaethedig. Mae'ch barn chi'n cyfri!



Am fwy o wybodaeth ewch i:
www.craffamwastraff.org.uk

